

Joselin Croes, director Arubahuis:

Di 100% di studiantenan cu bay Hulanda pa studia, 25% so ta caba e estudio cu nan a cuminsa



Studiantenan Arubiano cu ta bay studia na Hulanda den hopi caso ta enkontra diferente reto. Informacion ta un arma importante cu nan ta recurri na dje y den un esfuerso pa yuda e studiantenan cu mas informacion posibel den varios aspecto,

director di Arubahuis, sra. Joselin Croes, a implementa un handboek cu ta acapara informacion riba diferente aspecto cu e studiantenan ta desea di haya mas informacion riba dje.

Den un entrevista cu Bon Dia Aruba Croes a splica

primeramente dicon nan a dicidi di traha e buki aki. El a splica cu ora el a yega na Arubahuis el a ripara cu falta hopi data y informacion. Pa solucion esaki, el a sigui splica, prome cos cu el a haci ta tene un encuesta na unda ta puntra studiantenan kico ta e problemanan di mas grandi, kico ta e retonan cu nan tin, con nan por yuda nan miho, kico ta tayernan cu nan ta desea di haya, kico ta temanan cu nan tin mester of cu nan falta informacion.

Un segundo encuesta cu nan a realiza ta cu dia cu e grupo di studiantenan a yega e aña aki, nan a haci otro encuesta pa puntra e studiantenan con nan ta haya e opvang, con ta haya e siman di orientacion cu Arubahuis ta brinda ora cu e estudiante caba di yega.

Croes a remarca cu di e encuestanan aki nan a haya suficiente informacion pa traha un handboek cu ta acapara tur e puntonan cu e studiantenan a indica cu nan tabata desea di haya mas informacion tocante di dje prome cu nan a bay Hulanda.

E puntonan aki ta inclui, entre otro, seguro. El a resalta cu tin hopi falta di conocimiento riba e topico di seguro cual ta crea cu e studiantenan ta haci fout. El a indica cu nan ta scoge un seguro barata y e seguro ey no ta cubri dentista, no ta cubri si nan cas of camber pega na candela, e no ta cubri fysiotherapy, entre otro cosnan, pasobra nan ta scoge un seguro barata sin controla kico nan polisa tin hinca aden. Hunto cu seguro tambe ta bin informacion tocante unda nan por haya dokter, etc.

Di dos punto cu e studiantenan mester mas informacion riba dje ta huisvesting, kico nan mester haci y unda nan por aplica. Arubahuis a pone tur e websitenan di tur e regionnan y tur e instancianan cu tin cas pa huur pa estudiante.

Di tres punto ta DUO, con esaki ta traha, con e studieleuning ta traha, ki ora nan ta bin na remakre pe, ki ora nan por perde, cuanto nan tin cu paga back, ki tempo nan tin cu cuminsa paga back y tur e exigencianan pa DUO.



Otro informacion importante cu Croes a menciona ta kikco e studiantenan mester sa, kico ta e tipsnan pa por biba na Hulanda. Entre otro costo di bida, unda pa haci compras di cuminda mas barata, con pa maneha e placa. El a señala cu pa hopi di e muchanan esaki ta prome biaha cu nan ta bay biba nan so, riba nan mes. Tin nunca a maneha nan mesun placa y den e prome luna nan ta gasta tur nan placa y despues no tin placa pa paga gastonan.

Otro topico cu e handboek ta toca riba dje ta belasting. Croes a informacion cu di e encuesta a resulta cu 50% di e studiantenan ta traha y studia, cual ta un cantidad hopi halto y hopi di nan no sa cu nan mester paga belasting.

Di otro banda el a splica cu ora nan traha nan ta perde nan zorgtoeslag of nan ta perde nan DUO toeslag, puntonan importante cu e studiantenan mester tene cuenta cune y mester sa kico ta e implicacion ora nan bay traha.

Arubahuis a hinca tur posibel informacion cu ta importante pa e estudiante den e handboek yama "Handboek voor Arubaanse Studenten in Nederland" y informacion aki ta wordo actualisa continuamente basa riba puntonan cu studiantenan ta trece dilanti.

Banda di esey, Croes a agrega, a modernisa e website y ta bay bin un chatbot cu ta bay contesta preguntanan cu e studiantenan por tin. Tur esaki ta den un esfuerso pa acapara e tantisimo preguntanan cu nan ta hayando.

Adicionalmente, banda di e encuesta, Croes a indica nan ta realizando cada kwartaal e evento "Ban Topa". Esaki ta un evento caminda ta topa cu studiantenan den nan region y ta brainstorm con Arubahuis por mehora e servicio cu nan ta brinda na e studiantenan, ki tayer nan por haci pa nan e siguiente aña, etc.

Danki na tur e esfuersonan aki, el a remarca, nan ta hayando hopi data y informacion. El a indica cu nan ta den contacto constante cu e studiantenan y e asociacionnan pa asina den 2025 nan por traha un plan nobo, cual nan ta bezig cune, cu yama "Studentenan Success Beleid" pa sigura exito di e studiantenan pasobra aworaki, el a subraya, e cifranan di exito di e studiantenan ta alarmante.

Croes a remarca cu di 100% di e studiantenan cu ta cuminsa nan estudio na Hulanda cada aña, 50% ta drop out e di dos aña y otro 25% ta drop out e di tres aña. Esaki ta nifica cu di 100% di e studiantenan cu ta yega Hulanda pa cuminsa nan estudio, 25% so ta caba e estudio cu nan a cuminsa. E cifranan aki ta inclui studiantenan cu ta cambia di estudio tambe. Mayoria di e studiantenan aki ta bay back Aruba y tin ta bay traha, entre otro razonnan.

Potret di Facebook page di Arubahuis

